

Kugujni

id weera ideen wee daachchintaani, miira messan. id wiida agar wiirri weella eskaleeg toddedaagon. ideengon jellilog meskafin. yoom weekka wiida meskafiintaan banynyon: yaa allaaha yaa ilaahi kugujtereda ikkangoon bitaanterekka ayga deeno. juntanga shaharka oomreda kiragoon orrooson. daayag ekkashshangoon kuguj weekka unnooson kugjikkon mira juu uffil torjooron. keyya kugjin jebel weerangoosagoon uffil daaffin. yoom weekka wiida meskagoon mehegdangon ideentoodi, yaa allaahu in idta in kabatootta naay fa aawrootte. yoo ay fa aawirteere iyyon. banynyon: woon ayga yoo iigi weekka hiddo else assen bitaanga kummun. uffiltoon urka ooseda kiragoon banynyon yoo aboo kachcha kunnaa? eyyo iyyon. woon aboo degerka kunnaa? eyyo iyyon. kajil degerka okkiroosa kitti weekka toffilakir degerin tuul idroosa, kooska toffilin kochchil okkiroosa ayga kajn ukkil idroosa kachcha sikkal idroose iyyon. ingir aawoosongoon kugji kajn ukkil aagintaan jkti jkti jkti iigaten tanynyeya. in kajli juun eskalee weella fentin moollo menjongoon kuguj banynyon woo yaabo woo yaabo kir kabakka dimm. faab banynyon assen walaa bitaanga kummun woon in ayga yaabo iigi mina bism illah? woo yaabo gadaag kir sokke iyyon. kutta juukangoon ukkin tuul aagintaan aa banynyin. ir naasi iyyon? aylinaan ayga oose iyyon. oosoosongoon banynyon ayga juu tukmil okkiroosa kabar inga kir kab. juu tukmil bondi weellog okkiroosongoon jkti jkti jkti iy tiig aa weegin. taffaabikkon kaba tanga kabja juu tukmiltoon sukkiroosoni iigatiron kooska aneen okkiredaagsiin naattin okkiron aygoon ukkil idroosa kachcha sikkal idron. sikkal idrooson nogafiingooni, markatti kolodi shongirin dukki weekka marka kaaginnan. werwee tenniddan banynyisan, in kaj suudta nogafiillog wessiledallo. hussan tiigooson, ukkin tuula. tekkon kajil dukki tennig okkiroosa weegessan. kajin noogin sikkaltoon fakkangoon kachcha kowwa sikkal iden, ingeentaan noogn agilla juwongoon banynyon: woo yoo woo yoo tekkon miroochchisan. woo yoo in dukkig sukkire iyyon. sukkirongoon gusseel faddiye iyyon. galleda juukangoon nabin kuus weekko shongirin kuus weekkoli daaffiijinnan. gusseel idir kasse iyyon idir kassooson. iigatiron weekkuullon kir amanga ikkan tokkon inguulog amanga tichchitam. kuguj daara juu kikkangoon ooy diigid wee noogn agilla daarin. issigon yoo yoo in ooy inkelle mina? naayguu inna kachchisa? iigon aadem diigid wee kachchisan. man kuuslog ir amanga tichchalgeno iyyongoon eyyo iigon. gusseeg uffire iyyon guseen moollogoon nelli weekka adla iskir aygoon gusseel idir. hadiid weekka iigil idroosongoon echchu gusseel idrooson. markattii kachchisangoon hadiitootta iigil idrooson. wee tellatoon banynyon ayiin gusseel torjoora weera ikkeeg ay dukkig sokkedollin, ayga oosan. tariin ingir sukka toossiindan in hadiidlog usurra shaagoosa weera iyyon. tekkon sokka

oosoossan. man wiida man hadiidlog usurra shaagdangsiinga sirrakirechchon. uwuttikkon banynyon wee moola ay fa weera uwwo il, uwwo ikkeeg ayga oosan. tariin ingir sukka tooreddangoon weera uwwo intaan takkoon shaagoottiron sokkoosoossan. tuskunti banynyon uwwo moola, ayiin weera, uwwo, tusko ikkeeg sokkoosan. tariin sukka juweddangoon man hadiid teelafiikka weera uwwo tusko intaan kokkoottiron sokkoosoossan ingirgoon kolodingaarka kokkijatichchon. miroochchisan. juwagoon in kuguchcha gaadiil shekkoossan gaadiikkon talabba idirtiron. yoo iigon, hooy iigongoon issigon abo melaayag kunnaa? eyyo iyyongoon yalla ayga aboon melaayag kiidiroose iyyon. melaayag kiidiroosongoon juu gaadiin moollo kursi weella aagin markattiin juwen gabillo. manguu toora juusangoon banynyon gaadiiyi inguul ikka shekkedaaginnanaya. iigon mingay shekkedaaginna? mowlaana iriin nalellin ayi, ayli kuguj weera intaan agka aag banynyir, abookkoni oshshi kolodta kunin, inguullegoon gennan, aboon oshsha mennan. mingay ayga shekkedaagjinna, aylin tekka fa shekkijoyi, iirin daaffijekkoon banynyon. kawwir keshfa guunyjikangoon iiglog hitmafijinnan. gaadiikkon tayyib ussen milik tenna mennokkome mingay tekka shekkijlo, hiddo maalka elso ussen oshshi tenna mennokkome? aagintaangoon faaya hitmoottichchon teriin oshshi tenna inekka.